

Selalu pantau bekalan beras negara di pasaran

SAUDARA PENGARANG,

SAYA tertarik dengan satu tajuk berita sebuah akhbar tempatan baru-baru ini bertajuk 'Malaysia perlu hasilkan padi tahap sara diri'.

Sekiranya pesawah padi mahu berubah dan dapat menghasilkan pengeluaran padi sekitar 10 tan sehektar, maka tidak mustahil kita akan dapat membekalkan 100 peratus bekalan beras di dalam negara.

Sungguhpun begitu, kerajaan menerusi Kementerian Perdagangan Dalam Negeri

dan Kos Sara Hidup (KPDN) diharap dapat menjalankan pemeriksaan secara berkala mahupun mengejut terhadap 31 pemborong dan 385 premis di seluruh negara.

Ini bagi menguat kuasa dan memantau bekalan beras agar dapat dijual pada harga yang telah ditetapkan di seluruh negara.

Ini diharap dapat menjadi satu usaha untuk menyokong nasib pesawah dalam mendapatkan harga yang adil, seterusnya menjadi satu semangat untuk merealisasikan

hasrat bekalan 100 peratus beras tempatan dalam negara.

Sehingga saat ini, kerajaan mengawal harga beras tempatan yang menghendaki semua pemegang Lesen Kilang Padi Komersial dan Lesen Borong Beras mematuhi harga kawalan maksima yang ditetapkan sejak 16 Jun 2023 seperti mana yang termaktub dalam peruntukan Akta Kawalan Padi dan Beras 1994 (Pindaan 2022).

Kegagalan mematuhi peraturan yang ditetapkan boleh dikenakan sabitan kesalahan bermula daripada mana-mana

seksyen 17 hingga seksyen 21 dan hukuman boleh dikenakan berdasarkan seksyen 22 di bawah Akta Kawalan Padi dan Beras 1994 (Pindaan 2022).

Sekiranya terdapat tindakan menukar bungkusan atau label beras tempatan kepada beras import boleh disabitkan sebagai satu kesalahan di bawah Seksyen 5(1)(b) Akta Perihal Dagangan 2011.

Mereka boleh didenda tidak melebihi RM250,000 bagi suatu pertubuhan perbadanan dan denda tidak melebihi RM100,00 atau dipenjarakan selama

tempoh tidak melebihi tiga tahun atau kedua-duanya bagi mana-mana orang yang bukan sebuah pertubuhan perbadanan.

Diharap perkara ini perlu diberi perhatian sewajarnya bagi membolehkan pesawah tempatan mendapat keadilan dari segi harga.

Ini akan membawa kebaikan kepada semua pihak termasuk kerajaan.

**DR. MUHAMMAD HAFIZ
BADARULZAMAN**

Pusat Pengajian Undang-
Undang, Universiti Utara Malaysia